



mjesečni Bilten



juli
srpanj
2025.

314

omladinska mreža bosne i hercegovine
ISSN 2831 - 0845

Dragi prijatelji/ce,

Predstavljamo vam **julsko** izdanje (broj **314**) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-crnogorsko-hrvatsko-srpskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.orctuzla.ba



S A D R Ź A J

Aktivnosti u julu.....	2
Planovi za avgust.....	6
Aktivnosti članova mreže.....	7
Saopštenja/informacije/donatori/pozivi.....	13

Uživajte u čitanju!

AKTIVNOSTI ORC/HCA U JULU



Mladi iz Tuzle uspješno simulirali pisanje i prezentaciju projekata.

U okviru projekta **Rise & Lead**, 11. i 12. jula, Omladinski resursni centar Tuzla organizovao je dvodnevnu aktivnost pod nazivom **Simulacija projekata**, tokom koje su mladi imali priliku prvi put se okušati u pisanju i javnoj prezentaciji vlastitih projektnih prijedloga.

Aktivnost je realizovana u dvije faze. Prvog dana učesnici su, pod mentorstvom tima ORC-a, radili u manjim grupama na izradi projektnih aplikacija koristeći standardizovani obrazac Fondacije tuzlanske zajednice. Timovi su razvijali ideje, razrađivali ciljeve, planirali aktivnosti i budžet, a zatim pripremili finalne aplikacije za prezentaciju.

Drugi dan bio je rezervisan za simulaciju pravog *donatorskog intervjua*. Svaki tim je imao deset minuta da pred "komisijom" predstavi i odbrani svoj projekat, odgovarajući na pitanja vezana za održivost, uticaj i logiku budžeta.



Kroz ovaj proces, 15 mladih učesnika steklo je konkretne vještine pisanja projekata, javnog nastupa i timskog rada. Svi su nagrađeni certifikatima o učešću, dok je jedan tim dobio posebno priznanje za najizvodljiviji i najkreativniji projektni prijedlog.

Ova simulacija još jednom je potvrdila da mladi, kada dobiju prave alate i priliku, mogu postati nosioci konkretnih promjena u svojim zajednicama.

Projekat je podržan od strane **Fondacije Tuzlanske zajednice**.



Boje koje spajaju ljude: ORC Tuzla i Kaleidoskop street art donose još jedan mural u srce grada



U periodu od 22. do 24. jula 2025. godine, u okviru **Kaleidoskop festivala street arta**, **Omladinski resursni centar Tuzla** realizovao je još jednu uspješnu umjetničku akciju – oslikavanje murala u javnom prostoru grada Tuzle.

Ovaj mural nastao je kroz zajednički rad i kreativni doprinos brojnih volontera i tuzlanskog mural umjetnika **Mirana Mujačića**. Za muziku tokom kreiranja murala bio je zadužen naš **DJ Shadow**.

Ovaj mural nije samo vizuelna transformacija jednog zida – on predstavlja prostor za susret umjetnosti, aktivizma i zajedništva. U vremenu kada je važno jačati osjećaj pripadnosti i odgovornosti prema javnom prostoru, ovakve inicijative dodatno osnažuju poruku da grad pripada svima nama – i da ga možemo zajedno učiniti ljepšim, inspirativnijim mjestom.

Aktivnost je realizovana u sklopu **Kaleidoskop festivala**, višednevnog kulturno-umjetničkog događaja koji slavi kreativne izraze u urbanim sredinama i nudi prostor mladima da aktivno učestvuju u oblikovanju kulturne scene svog grada.

Svi koji nisu imali priliku biti prisutni na licu mjesta mogu zaviriti u atmosferu putem objava na društvenim mrežama ORC Tuzla, gdje su zabilježeni trenuci rada, druženja i kreativnog izraza. Ovom prilikom se zahvaljujemo **Gradskoj upravi Tuzla**, **Turističkoj zajednici grada Tuzla**, **JU Saobraćaj i komunikacije** i **radio Kameleonu Tuzla**, koji su nam pružili nesebičnu podršku.





Mladi dizajniraju mir: Održan trening „Designing Peace“ u Tuzli

U periodu od **26. do 28. jula 2025. godine**, u organizaciji **Omladinskog resursnog centra Tuzla**, uspješno je realizovan trodnevni trening „Designing Peace“ – edukativno i praktično iskustvo koje je okupilo **16 mladih učesnika** iz različitih dijelova Bosne i Hercegovine.

Cilj treninga bio je osnažiti mlade da prepoznaju vlastitu ulogu u izgradnji mira u svojim zajednicama, te ih opremiti znanjima i vještinama za osmišljavanje i sprovođenje **uličnih mirovnih akcija** koje šalju snažne poruke, pokreću dijalog i ostavljaju trag.

Poseban fokus bio je stavljen na **praktičan rad**, gdje su mladi, uz mentorsku podršku trenera, razvili ideje za vlastitu **mirovnu akciju** koju će u **septembru ove godine**, .

Ovaj trening predstavlja **prvi korak** u širem ciklusu aktivnosti koje ORC Tuzla planira realizovati tokom 2025. Godine.

Zahvaljujemo svim učesnicima na entuzijazmu, otvorenosti i spremnosti da zajedno dizajniramo mir – ne samo kao koncept, već kao realnu snagu koja pripada onima koji vjeruju da Bosna i Hercegovina može i mora biti drugačija.

Trening „Designing peace“ podržan je kroz projekat „**Jačanje povjerenja i kohezije u zajednicama u Bosni i Hercegovini - Možemo Bolje**“





Boje mira u rukama mladih: Održana radionica „Paint & Peace“ u Tuzli



U sklopu **Kaleidoskop festivala**, mladi iz svih krajeva Bosne i Hercegovine imali su priliku učestvovati u jedinstvenoj radionici pod nazivom „**Paint & Peace**“ – poznatoj i pod imenom „**Paint & Višnja**“. Ova kreativna radionica bila je prostor u kojem su učesnici, kroz umjetnost, izražavali vlastita viđenja **mira, zajedništva i budućnosti koju žele graditi**.

Kroz opuštenu atmosferu, razgovor i izražavanje kroz boju i pokret, mladi su se povezivali, dijelili iskustva i razmišljanja, te na simboličan, ali snažan način – slali poruke mira iz **srca Tuzle**. 🎨🕊

Uz **kistove, platna i mnogo smijeha**, prostor se pretvorio u otvoreni dijalog kroz umjetnost. Radovi nastali tokom radionice reflektovali su lične i kolektivne narative učesnika, pokazujući da mir ne mora biti tišina – već **kreativna galama onih koji žele više od svoje budućnosti**. Radionicu i izložbu radova vodile su naše **Mirela Biković i Nadina Mehić**.

Radionica je dio šireg ciklusa aktivnosti posvećenih **izgradnji mira među mladima**, te je još jednom pokazala da kada se mladima pruži sloboda izražavanja – nastaju poruke koje vrijedi čuti i slike koje vrijedi pamtiti.

Ovom prilikom se zahvaljujemo **Gradskoj upravi Tuzla, Turističkoj zajednici grada Tuzla i “Park pubu” Tuzla**, koji su nam pružili nesebičnu podršku u izvođenju ovih aktivnosti.





CAT – Bosna i Hercegovina

I u julu smo nastavili sa našim redovnim aktivnostima u okviru inicijative „CAT – Bosna i Hercegovina“. Naše mačke su i dalje osvajale srca javnosti na društvenim mrežama, deleći brojne meme-ove, pozive na seminare i inspirativne priče o mladima iz Bosne i Hercegovine.

Ukoliko još uvijek ne pratite naše mačke – pozivamo vas da to učinite na:

[Facebook](#), [Instagram](#) i [Youtube kanal](#).



Ruže su crvene
Dođeš li sa njom,
reci glavi ćaos



Redovne aktivnosti ORC / hCa u junu

Tokom jula smo radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.orctuzla.ba). U okviru toga smo svakodnevno na mejling listu mreže (omladina@orctuzla.ba), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Isto tako, radili smo i na održavanju komunikacija i koordinacije unutar Bosanskohercegovačke Anna Lindh mreže (<https://orctuzla.ba/alfbih/>, <https://www.facebook.com/groups/httpswww.alfbih/>) Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA AVGUST 2025.

- ❖ U okviru aktivnosti na projektu „Gen Z Rising“ – **Novi lideri za mir – Millennials supporting, podržanog od strane IOM Sarajevo**, nastavljamo aktivnosti. Sredinom avgusta planiramo održavanje treninga – „Forum teatar“ u Tuzli.
- ❖ Nastavak rada na projektima, fundraisingu;
- ❖ Priprema projektnih prijedloga za pozive koji su u toku;
- ❖ Razvoj strategije aktivnosti ORC i Omladinske grupe za 2025. godinu.

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac



Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su istraživali ljetne teme vezane za hranu i odjeću, istovremeno stvarajući razne zanimljive predmete. Zbog velikih vrućina, grupa je izradila male lepeze kako bi se rashladili. Prioritet su dali takmičarskim igrama i timskim aktivnostima na otvorenom, kao i učešću u edukativnim kartaškim igrama i izradi nakita. Grupa je nastavila sa muzičkim radionicama,



uvježbavanjem ritmova i pjesama. Učesnici su nastavili da uče ćirilčno pismo vežbajući pisanje slova Л, Љ i H (L, Lj, N) i jednostavnih riječi na ćirilici. Izvodili su vježbe zagrijavanja i dječju jogu, a svakog četvrtka su plesali, učestvovali u sportskim aktivnostima i radili na održavanju fokusa i koncentracije dok su čitali i slušali priče. Na radionicama engleskog, njemačkog i turskog jezika učili su riječi koje se odnose na gmizavce, morske životinje, ljetnu hranu i gusjenice. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: govor mržnje, dječji rad, izbjeglice, okoliš i društvene igre. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su radili na uvježbavanju gramatike i svakodnevne komunikacije, čitanju i prevođenju kratkih tekstova i fraza, školskim domaćim zadacima i zanimljivim projektima



Radionice gitare

Učesnici su postepeno napredovali, radeći na različitim muzičkim kompozicijama kako bi razvili svoje vještine, samopouzdanje i muzički izraz. Njihovi nastupi na Proljetnoj zabavi pokazali su koliko su napredovali. Vježbali su sve – od osnovnog ritmičkog sviranja do naprednijih tehnika kao što su bare akordi, bas linije i klasična djela, čime su gradili čvrste muzičke osnove.



Radionice sambe

Grupa je radila na svojoj kompoziciji *"Pralinen Meister"*, uvježbavajući koordinaciju i kreativnost. Isprobavanjem različitih harmonija, ritmova i dinamike, učinili su kompoziciju izražajnijom i dotjeranijom. Timski rad i kreativni eksperimenti doprinijeli su poboljšanju ukupnog zvuka. Kompoziciju su izveli u sklopu Proljetne zabave u Omladinskom centru u Brčkom.



Muzičke radionice (mlađa grupa)

Učesnici su radili na stvaranju zanimljivog uvoda i dva prelaza, s ciljem da ti dijelovi budu različiti kako bi zadržali pažnju slušalaca. Isprobavali su razne zvukove i dinamiku kako bi poboljšali tok i povezanost kompozicije, a pritom su razvijali i svoje, kao i grupne vještine. Grupa je izvela svoju kompoziciju *"Ready Fredy"* na godišnjoj Proljetnoj zabavi.



Art radionice na engleskom jeziku za učesnike uzrasta 13+

Tokom ljeta smo nastavili s likovnim radionicama koje obuhvataju crtanje i slikanje. Ovaj mjesec su učesnici počeli praviti makete od kartona, koje predstavljaju Svitac Omladinski centar kakav oni žele da imaju u svom gradu. Radionice se odvijaju na engleskom jeziku i, osim što nude mogućnost za usavršavanje konverzijskih vještina, predstavljaju kreativan prostor za lično izražavanje i istraživanje umjetničkih potencijala učesnika. Kroz aktivnosti crtanja i skiciranja, učesnici razvijaju sposobnost pažljivijeg opažanja okoline, poboljšavaju fine, motoričke vještine i jačaju samopouzdanje u svom kreativnom izrazu. Ove radionice dodatno podstiču pažljivost i predstavljaju zdrav način izražavanja emocija. Radionice se održavaju svakog četvrtka od 14:30 do 16:00 sati u prostorijama Omladinskog centra.



Volonterski programi ESC/'Weltwärts

Svitac Hosting – U Svitcu trenutno volontiraju 2 weltwärts volontera iz Njemačke na period od 12 mjeseci i 4 ESC volontera iz Turske (1-2 mjeseca).

Svitac Sending – Sedam volontera iz BiH trenutno volontira u Njemačkoj, Austriji, Grčkoj, Italiji i Belgiji (2 sedmice-12 mjeseci).



Za avgust se planira nastavak svih aktivnosti Omladinske organizacije Svitac.

Institut za razvoj mladih KULT



4th Viteške brigade
34 – 36 BA, 71210 Ilidža, Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org



U Velikoj Kladuši otvoren je prostor za ideje, kreativnost i zajedničko djelovanje!

Svečanim otvorenjem **Omladinskog HUB-a, Velika Kladuša** je napravila snažan korak ka kreativnijoj i aktivnijoj zajednici, koja je prilagođena mladima.

Omladinski HUB, kao prvi ovakav centar u općini Velika Kladuša, otvorio je vrata za mlade, nudeći im mjesto gdje su ideje dobrodošle, gdje će njihovi glasovi da se čuju, a potencijal imati priliku da se razvija. Kroz pažljivo kreirane prostorije i sadržaje, HUB će postati centar omladinskog aktivizma, edukacije i kulture.

Kroz saradnju sa lokalnim vlastima, obrazovnim ustanovama, nevladinim organizacijama i privatnim sektorom, osigurani su temelji za dugoročnu održivost centra. Pokrenute su inicijative za institucionalnu podršku, kreiran je model članstva, a razvijeni su i prvi oblici socijalnog poduzetništva koji će pomoći HUB-u da samostalno raste i traje.

Otvaranjem Omladinskog HUB-a Velika Kladuša tek započinje priču koja će se nastaviti svakim osmijehom, svakom realiziranom idejom i svakim novim glasom mlade osobe. Jer kada mladi imaju prilike – oni pokreću i promjene!

Uređenje i otvaranje prostora realizirano je uz podršku **Općine Velika Kladuša i Instituta za razvoj mladih KULT**, u sklopu projekta **Vijeća mladih općine Velika Kladuša – “Omladinski HUB Velika Kladuša – Prostor za Aktivizam i Razvoj”**.





Od obuke do promjena u zajednici: Kako “Uči, Misli i Djeluj!” oblikuje buduće lidere?

Tokom drugog modula “Uči, Misli i Djeluj” obuke (**UMiD19**) za omladinske lidere, polaznici su imali priliku da kroz predavanja, praktičan rad i razmjenu ideja dodatno razvijaju svoje znanje i vještine, ali i da se dodatno motiviraju za aktivno djelovanje u svojim zajednicama.

Modul je započeo razgovorom o politikama prema mladima sa trenericom **Jasminom Banjalučkić** iz **Instituta za razvoj mladih KULT**, koja je na dinamičan način uvela polaznike u ovu temu. Kroz interaktivne vježbe i primjere iz prakse, približena im je složenost procesa donošenja odluka, važnost uloge mladih u sistemu i njihovog aktivnog učešća u kreiranju politika.

Nakon ove sesije, polaznici su bolje shvatali sistem, osnaženi da svoje ideje pretoče u konkretne aktivnosti u svojoj zajednici.

U sklopu modula, budući mladi lideri su imali priliku čuti i nešto više o Narandžastom danu, danu obilježavanja borbe protiv nasilja nad ženama i djevojčicama, koji Institut obilježava svakog 25. u mjesecu. Razgovor o Narandžastom danu otvorio je prostor za planiranje kampanja i budućih aktivnosti sa učesnicima obuke koji će imati priliku svoje zajednice obojiti u narandžasto, s ciljem podizanja svijesti o ovom problemu.

Modul je zaokružen predavanjima **Ilije Trninića**, koji je sa polaznicima razgovarao o temama zagovaranja i lobiranja. Kroz konkretne primjere, Ilija je jasno razgraničio ova dva pojma, ukazao na njihove specifičnosti i podijelio korisne alate za kreiranje efikasnih strategija utjecaja. Njegov pristup dao je učesnicima, ne samo teorijsko znanje, već i inspiraciju da budu glas svoje zajednice i aktivno se uključe u procese donošenja odluka.

UMiD19 tromjesečni je program obuke koji organizira i provodi **Institut za razvoj mladih KULT**. Program se sastoji od 3 modula u okviru kojih se obrađuje 10 tema koje su mladim osobama neophodne da budu aktivni članovi društva i lideri u zajednici. U 2025. godini devetnaestu generaciju UMiD-a će pohađati 10 mladih ljudi iz 10 zajednica iz Bosne i Hercegovine





#JOSUVIJEKSAMTU u Bosanskoj Krupi: Dijalogom za bolju budućnost mladih!

Institut za razvoj mladih KULT i Vijeće mladih Bosanska Krupa krajem mjeseca jula organizirali su događaj „*Moje mjesto pod suncem: Prilike, izazovi, odluke*“. Učesnici iz Bosanske Krupe i mjesta u blizini, imali su priliku razgovarati sa Arminom Halitovićem, gradonačelnikom Bosanske Krupe, Amilom Rekićem, članom Vijeća mladih Bosanska Krupa i učenikom generacije Mješovite srednje škole “Safet Krupić” te Ismetom Bešićem, predsjednikom Vijeća mladih Bosanska Krupa.

Fokus razgovora bio je na vrlo važnoj temi za mlade u Bosni i Hercegovini o kojoj se često govori – *ostanak ili odlazak* iz zemlje. Kroz razgovor, razmjenu iskustava i mišljenja, učesnici su govorili o prilikama koje imaju u Unsko-sanskom kantonu, a prvenstveno u Bosanskoj Krupi, ali i o izazovima s kojima se svakodnevno susreću. Događaj je dio kampanje #JOSUVIJEKSAMTU koju provodi Institut za razvoj mladih KULT, a koja akcenat stavlja na stvarne priče i dileme mladih ljudi u vezi sa izgradnjom budućnosti u BiH.

Posebno inspirativnim ovaj susret učinili su učesnici – sjajni mladi ljudi koji su pokazali da žele biti dio rješenja, da nisu samo pasivni posmatrači nego pokretači promjena. Mladi su podijelili svoja iskustva i potrebe sa svojim vršnjacima i gradonačelnikom Grada Bosanska Krupa, a gradonačelnik je izrazio interesovanje i spremnost za dalju saradnju s mladima i podršku njihovim idejama i inicijativama.

Kao dio kampanje #JOSUVIJEKSAMTU u Bosansku Krupu stigla je i mini biblioteka koja će u narednih nekoliko dana zvanično biti dostupna svim ljubiteljima knjige u Bosanskoj Krupi. Građani će imati priliku odabrati knjigu za sebe kao i donijeti i pokloniti knjigu koju žele da neko drugi pročita. Povezujući ovu aktivnost upravo sa razgovorom sa mladim uspješnim ljudima u formalnom i neformalnom obrazovanju, mladi žele ostaviti poruku zajednici – da su zainteresirani učiti, dijeliti znanje i graditi bolje društvo.

Kroz ovaj događaj, još jednom je potvrđeno da je važno da se glas mladih čuje, da njihovi problemi, ideje i spremnost da djeluju zaista dođu do onih koji će im u tome pomoći, kako bi zajedno pokretali promjene i kreirali bolju budućnost u svojim zajednicama.



INFORMACIJE / NAJAVE / DONATORI / POZIVI

1. JAVNI POZIV ZA PODNOŠENJE PRIJEDLOGA PROJEKATA U OKVIRU PROGRAMA „GRAĐANI, JEDNAKOST, PRAVA I VRIJEDNOSTI“, (CERV) 2021. – 2027.

Na web stranici Ministarstva pravde Bosne i Hercegovine i Evropske komisije, objavljeno je šest novih poziva za prijedloge projekata u okviru programa „Građani, jednakost, prava i vrijednosti“ (CERV) 2021. - 2027. godine.

Više o samim programima, temama koje obuhvataju, kao i načinu apliciranja možete pronaći na linku:

<http://www.mpr.gov.ba/aktuelnosti/vijesti/default.aspx?id=16955&langTag=bs-BA>

Javni poziv je otvoren do 23.10.2025. godine.

2. Ljetna škola „Žene, mir i sigurnost“ 2025

Sarajevo - 22–26. septembar

Želiš razumjeti kako rod, sigurnost i mir funkcionišu u postkonfliktnim društvima?

Pridruži se jedinstvenoj međunarodnoj ljetnoj školi i uči direktno od akademskih i međunarodnih stručnjaka/kinja!

Otvoreno za studente/ice i mlade profesionalce/ke sa Zapadnog Balkana, uz nekoliko mjesta rezervisanih za međunarodne studente/ice. Program se izvodi na engleskom jeziku. Svi troškovi su pokriveni!

Rok za prijavu: **12. august 2025.**

Prijava putem linka dostupnog na: www.summerschool.ba

Više informacija na: nhalilovic@fkn.unsa.ba

Ljetnu školu organizuje @univerzitet.unsa @fknss uz podršku Ujedinjenih nacija @UnitedNationsBiH @UnitedNationsAlbania u okviru @UnitedNationsPeacebuilding inicijative [#ŽeneVodeBiH](https://www.un.org/en/peacebuilding/peacebuilding-initiatives/peacebuilding-initiative) koju implementiraju @unwomenbih, @IOMBiH, @UNFPABiH u partnerstvu sa @MLJPIBiH, i u okviru regionalnog programa [#Y4IET](https://www.un.org/en/peacebuilding/peacebuilding-initiatives/peacebuilding-initiative) koji implementiraju UN agencije, predvođene @UNDPsrbia u partnerstvu s @unwomenalbania. Nastavu će izvoditi profesori/ce fakulteta i odabrani stručnjaci/kinje.

[#WomenLeadPeaceFollows#WPSSummerSchool2025#unsa#fknss#WPS#YPS#GenderSecurity#PeaceBuilding](https://www.un.org/en/peacebuilding/peacebuilding-initiatives/peacebuilding-initiative)

3. Obuka za pisanje projekata

Pažnja, pažnja! Organizujemo obuku za pisanje projekta koja počinje 27. avgusta, online, i biće realizovana u nekoliko interaktivnih sesija.

Obuka je namijenjena prvenstveno učesnicima iz organizacija civilnog društva iz nerazvijenih i ruralnih zajednica u BiH, dok je poziv otvoren i za druge zainteresovane. Obukom su obučavane sljedeće teme:



- Programski okvir i projektna aplikacija
- Priprema budžeta
- Izvještavanje i evaluacija.

Interes za učešće se može iskazati do 15. avgusta putem linka <https://forms.gle/dBA77nK2GNxd6jkN6>

Prijava je obavezna. Broj učesnika je ograničen u cilju osiguravanja kvaliteta obuke. Odabir učesnika će biti vršen prema redoslijedu zaprimljenih prijava. Učesnici će biti blagovremeno obaviješteni o detaljima u vezi obuke putem email-a.

Radujemo se novom radnom druženju. Pridružite nam se.



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla

Hadži Bakirbega Tuzlića 1

75000 Tuzla

tel/fax: 035 258 077

e-mail: orctuzla@bih.net.ba

Mjesečni bilten uređuje Omladinski resursni centar - ORC Tuzla

Urednica Biltena:

Nadina Mehić

Prevod Biltena na

engleski: **Asja Šerifović**

WEB stranica Mreže:

www.orctuzla.ba

Mejling lista Mreže:

omladina@orctuzla.ba

Webmaster:

anicic.dev@gmail.com

ISSN (BHS Varijanta): **2831 – 0845**

ISSN (Engleski): **2831 0853**